

ZAKON O PRIVREDNIM DRUŠTVIMA

(“Službene novine Federacije BiH”, br. 23/99, 45/00, 2/02, 6/02, 29/03, 68/05, 91/07, 88/08 i 63/10)

IZVOD

Zakonom o privrednim društvima uređeno je osnivanje, poslovanje, upravljanje i prestanak privrednih društava u Federaciji Bosne i Hercegovine.

Društvo je pravno lice koje samostalno obavlja djelatnost proizvodnje i prodaje proizvoda i vršenja usluga na tržištu radi sticanja dobiti.

Društvo mogu osnovati domaća i strana fizička i pravna lica, ako zakonom nije drugačije određeno.

Društvo može biti organizovano u jednom od sljedećih oblika:

1. društvo s neograničenom solidarnom odgovornošću – firma (ime pod kojim Društvo posluje) mora sadržavati prezime najmanje jednog člana, uz oznaku da ih ima više, i oznaku “d.n.o”.
2. komanditno društvo – firma mora sadržavati prezime najmanje jednog komplementara i oznaku “k.d”, a ne smije sadržavati imena komanditora.
3. dioničko društvo – firma mora sadržavati oznaku “d.d”.
4. društvo s ograničenom odgovornošću – firma mora sadržavati oznaku “d.o.o.”

Svojstvo pravnog lica Društvo stiče upisom u registar društava. Društvo odgovara za svoje obaveze cjelokupnom svojom imovinom. Prije upisa u registar društava niko ne može nastupati u ime društva.

Društvo može kao svoju djelatnost obavljati sve poslove, osim onih koji se po zakonu ne mogu obavljati kao privredna djelatnost. Zakonom može biti utvrđeno da se određene djelatnosti mogu obavljati samo na osnovu predhodnog odobrenja nadležnog organa.

Društvo može imati podružnice – poslovne jedinice izvan mjesta sjedišta društva, koje nemaju svojstvo pravnog lica.

Društvo zastupa uprava koja organizuje rad i rukovodi poslovanjem, zastupa i predstavlja Društvo i odgovara za zakonitost poslovanja društva. Društvo mogu zastupati i druga lica određena osnivačkim aktom ili statutom društva, u skladu sa zakonom.

Prokura je pismeno ovlaštenje za preduzimanje svih pravnih radnji i poslova u ime i za račun društva, osim prenosa i opterećenja nekretnina ako ovlaštenje za to nije posebno i izričito navedeno. Prokura se ne može dati pravnom licu.

U društvu se ne mogu osnivati organizacije i provoditi aktivnosti koji nemaju karakter sindikata i sindikalnih aktivnosti u skladu sa zakonom, kolektivnim ugovorom i pravilima sindikata.

Podaci o društvu upisuju se u javni registar koji vodi institucija određena posebnim zakonom kojim se uspostavlja i uređuje organizacija i način rada javnog registra pravnih osoba - Registar društava.

U registar društava upisuju se sljedeći podaci o indentitetu društva:

1. firma i ako postoji, skraćena firma i adresa sjedišta društva;
2. oblik društva;
3. djelatnost;
4. podružnice;

5. ime i prezime, adresa prebivališta, funkcija i obim ovlaštenja lica ovlaštenih za zastupanje društva; i
6. firma, sjedište, djelatnost i lice ovlašteno za zastupanje podružnice.

U registar društava upisuju se podaci o članovima, ulozima i odgovornosti za obaveze društva, osnovnom kapitalu društva, udjelima i dionicama u društvu.

U registar društava obavezno se upisuje pokretanje postupka likvidacije i stečaja društva, ime i prezime i adresa prebivališta likvidacionog ili stečajnog upravnika i datum obustavljanja ili okončanja postupka.

Ovim zakonom je regulisano kako se vrši spajanje, pripajanje, podjela, promjena oblika i prestanak društva.

Društvo s neograničenom solidarnom odgovornošću je društvo najmanje dva lica koja su neograničeno solidarno odgovorna za obaveze društva. Društvo se osniva ugovorom o osnivanju. Ulozi članova mogu biti u novcu, stvarima, pravima i izvršenim uslugama. Vrijednost uloga u stvarima, pravima i vršenju usluga utvrđuje se ugovorom o osnivanju društva. Ulozi članova su jednake vrijednosti. Ulozi članova postaju imovina društva.

Komanditno društvo je društvo u kojem jedan ili više članova odgovara za obaveze društva neograničeno solidarno cjelokupnom svojom imovinom (komplementari), a jedan ili više članova odgovara za obaveze društva samo do iznosa njihovih uloga upisanih u sudski registar (komanditori).

Komanditno društvo se osniva ugovorom i na njega se primjenjuju odredbe ovog zakona o društvima s neograničenom solidarnom odgovornošću, ukoliko drugim odredbama ovog zakona nije propisano drugačije.

Komanditno društvo se može transformisati u komanditno društvo na dionice.

Dioničko društvo je društvo čiji je osnovni kapital podijeljen na dionice i osniva se ugovorom o osnivanju. Kada dioničko društvo osniva jedan osnivač, osnivački akt je odluka o osnivanju. Dioničko društvo ne odgovara za obaveze dioničara, a mogu ga osnovati jedan ili više osnivača. Osnivači su obavezno i dioničari dioničkog društva.

Prilikom osnivanja dioničkog društva, sve dionice mogu otkupiti osnivači (simultano osnivanje), ili ugovoreni broj dionica otkupljuju osnivači, a preostale dionice kupuju druga lica na osnovu javnog poziva za upis i uplatu (sukcesivno osnivanje), u skladu sa zakonom kojim se uređuje emisija i promet vrijednosnih papira.

Osnovni kapital dioničkog društva iznosi najmanje 50.000 KM. Nominalna vrijednost dionice ne može biti manja od 10 KM. Ako se osnovni kapital prilikom osnivanja dioničkog društva, osim u ulozima u novcu, obezbjeđuje i ulozima u stvarima i pravima, ukupni ulozi u novcu ne mogu biti manji od iznosa od 50.000 KM.

Ovaj zakon je uredio cijeli postupak osnivanja dioničkog društva, emisiju dionica, povećanje i smanjenje osnovnog kapitala, pravo preče kupnje, dionice zaposlenih, sticanje vlastitih dionica, organe društva, odlučivanje i dr.

Društvo sa ograničenom odgovornošću je društvo čiji je osnovni kapital podijeljen na udjele i osniva se ugovorom. Kada društvo s ograničenom odgovornošću osniva samo jedan osnivač, osnivački akt je odluka o osnivanju. Odredbe ovog zakona o dioničkom društvu primjenjuju se na društvo s ograničenom odgovornošću, ako posebnim odredbama nije drugačije određeno.

U društvu s ograničenom odgovornošću koje nema nadzorni odbor njegova ovlaštenja vrše članovi društva.

Osnovni kapital društva s jednim ili više osnivača iznosi najmanje 2.000 (dvijehiljade) KM, ako drugim zakonom nije određeno drugačije. Vrijednost pojedinačnog uloga ne može biti manja od 100 (stotinu) KM.

U kaznenim odredbama određene su novčane kazne u iznosu od 500,00 KM do 15.000,00 KM za Društvo koje počini prekršaj, odnosno za odgovorno lice u društvu 50,00 KM do 3.000,00 KM.

Ovaj zakon je objavljen u “Službenim novinama Federacije BiH” dana 21. juna 1999. godine, stupio je na snagu 29. juna 1999. godine, a primjenjuje se od 27. augusta 1999. godine.

Privredna društva su dužna uskladiti statut sa odredbama ovog zakona u roku od 180 dana od dana stupanja na snagu ovog zakona.

Zakon o izmjenama i dopunama Zakona o privrednim društvima objavljen je 29.09.2010. godine, a stupio je na snagu 30.09.2010. godine.